

Drög að lögum
Verkfræðingafélags Íslands,
félags verkfræðinga og tæknifræðinga,
sem taka eiga gildi 1. janúar 2007

Nafn félagsins og tilgangur

1. gr.

Félagið heitir Verkfræðingafélag Íslands, félag verkfræðinga og tæknifræðinga, skammstafað VFÍ. Heimili þess og varnarþing er í Reykjavík.

2. gr.

Markmið félagsins er að:

- Vera öflugur málsvari fyrir verkfræðinga og tæknifræðinga
- Standa vörð um gæði verkfræði- og tæknifræðimenntunar
- Gæta hagsmuna og standa vörð um réttindi félagsmanna
- Stuðla að bættum kjörum og aukinni starfsánægju félagsmanna
- Innan VFÍ fari fram öflug og lifandi starfsemi

3. gr.

Félagið vinnur að markmiðum sínum með því að:

- starfa meðvitað að öflugri ímyndarsköpun félags og stéttar í samfélaginu
- forystumenn og félagsmenn VFÍ séu virkir þátttakendur í þjóðfélagsumræðunni
- félagsmenn séu mótandi afl í þróun samfélagsins á sviði tækni og vísinda
- standa vörð um starfsheitin “verkfræðingur” og “tæknifræðingur”
- stuðla að góðum tengslum við þær menntastofnanir sem annast kennslu í verkfræði og tæknifræði og tryggja gæði menntunarinnar á Íslandi
- stuðla að endurmenntun og símenntun félagsmanna
- veita einstaklingsbundna þjónustu í hagsmunamálum félagsmanna
- starfrækja upplýsingaveitu um kjaramál í víðum skilningi
- starfrækja samninganefndir sem gera kjarasamninga “við aðila vinnumarkaðarins”
- halda uppi fjölbreyttu, skemmtilegu og auðgandi fag- og félagsstarfi
- reka félagið á traustum grunni með fjölbreyttum tekjustofnum

Réttindi og skyldur félagsmanna

4. gr.

Almennir félagar geta orðið:

1. þeir sem lokið hafa viðurkenndri prófgráðu í verkfræði, en tæknifræðináam er námsbraut í verkfræði, svo og þeir sem lokið hafa viðurkenndri prófgráðu í þeim vísindagreinum sem verkfræðin byggist á, s.s. eðlisfræði, efnafræði, stærðfræði
2. Stjórn félagsins getur boðið fræðimönnum í raunvísindum og framkvæmdamönnum að gerast almennir félagar, enda mæli sérstakar ástæður með því. Stjórnin tekur endanlega afstöðu til slíkra umsókna.

Ungfélagar geta orðið verkfræðinemar, tæknifræðinemar og nemar í vísindagrein sem verkfræðin byggist á, sem lokið hafa einu námsári af háskólanámi. Ungfélagar hafa takmörkuð réttindi og skyldur meðan þeir stunda námið.

5. gr.

Stjórn félagsins getur kosið sem heiðursfélag sérhvern þann einstakling sem leyst hefur af hendi mikilsverð störf á sviði verkfræði eða vísinda. Til kjörs heiðursfélaga þarf samhljóða atkvæði allra stjórnarmanna.

Stjórn félagsins getur veitt heiðursmerki í viðurkenningaskyni fyrir vel unnin störf á sviði verkfræði eða í þágu félagsins.

6. gr.

Beiðni um inngöngu í félagið skal send stjórn félagsins skriflega. Menntanefnd VFÍ fær til umsagnar allar umsóknir um inngöngu í félagið og metur þær samkvæmt þeim reglum sem stjórnin hefur samþykkt um meðferð umsókna, þar sem m.a. skal kveðið á um lágmarkskröfur sem gera skal til menntunar nýrra félagsmanna. Ef umsögn menntanefndar er jákvæð ber stjórninni að veita umsækjanda aðild að félaginu. Ef umsögn er neikvæð getur stjórnin ekki veitt viðkomandi aðild að félaginu, nema í undantekningartilvikum, t.d. ef viðkomandi getur ekki aflað tilskilinna gagna vegna styrjalda eða af stjórnámálalegum ástæðum. Í slíkum tilvikum þarf stjórnin að samþykkja inngöngu samhljóða.

7. gr.

Úrsögn úr félaginu skal vera skrifleg og send félagsstjórn. Úrsögn fær gildi 4 mánuðum eftir að hún berst félaginu.

Eigi kjaranefnd félagsins í kjaradeilum á þeim tíma sem úrsögn er að öðlast gildi, getur stjórn félagsins framlengt úrsagnarfréttinn þar til deilu lýkur.

8. gr.

Félagsmönnum er skylt að fara eftir lögum félagsins, siðareglum og öðrum samþykktum þess. Sérhver almennur félagi er skyldugur til að verða við kosningu til starfa í félaginu, nema gild forföll hamli, en getur neitað endurkjöri jafnlangan tíma og hann hefur gegnt störfum.

Almennir félagar hafa rétt til að kenna sig við félagið og nota skammstöfun félagsins með nafni sínu. Almennir félagar og heiðursfélagar hafa rétt til að vera félagar í einni eða fleiri deildum félagsins með þeim takmörkunum sem lög þeirra segja til um. Atkvæðisrétt um öll félagsleg málefni hafa almennir félagar, enda séu þeir skuldlausir við félagið, svo og heiðursfélagar. Almennir félagar eru kjörgengir til stjórnarkjörs í félaginu.

Ungfélögum er heimil fundarseta á almennum fundum og á fundum í deildum. Þeir hafa ekki önnur réttindi í félaginu.

9. gr.

Ágreiningi, sem rísa kann á milli einstakra félagsmanna annars vegar og félagsstjórnar hins vegar um rétt eða skyldur félagsmanna má vísa til félagsfundar, og er úrskurður hans endanlegur.

Komi félagsmaður fram á þann hátt að ekki samræmist tilgangi félagsins, hag eða heiðri getur stjórn lagt til að honum verði vikið úr félaginu. Endanlega ákvörðun um brottrekstur tekur félagsfundur og þarf 2/3 atkvæða á félagsfundi þar sem slíkt mál er til meðferðar samkvæmt fundarboði.

Skipulag og stjórn félagsins

10. gr.

Aðalfundur fer með æðsta vald í málefnum félagsins. Starfsemi félagsins er stjórnað af stjórn undir forystu formanns. Stjórnin ræður starfsmenn. Sviðsstjórar eru yfir atvinnumálum, fagmálum og útgáfumálum og annast þeir dagleg störf í málefnum félagsins. Kjararáð gerir tillögu um ráðningu sviðsstjóra atvinnusviðs. Innan vébanda félagsins starfa deildir eftir þörfum. Fastanefndir starfa innan félagsins að sérstökum málefnum.

11. gr.

Í aðalstjórn sitja:

Formaður kosinn til tveggja ára annað hvert ár.

6 meðstjórnendur kosnir til tveggja ára annað hvert ár, þrír kosnir annað árið og þrír hitt árið.

3 varamenn kosnir til tveggja ára annað hvert ár.

Kosning fer fram með skriflegum eða rafrænum hætti í aðdraganda aðalfundar. Úrslit kosninga eru kynnt á aðalfundi.

Ákvæði til bráðabirgða: Á stofnfundi, haustið 2006, verður sérafbrigði þar sem kosinn verður formaður til tveggja ára (eða til aðalfundar 2009), óháð aðildarfélagi, ásamt 3 meðstjórnendum kosnum til tveggja ára (til aðalfundar 2009), einum frá hverju aðildarfélagi, og 3 meðstjórnendum kosnum til eins árs (til aðalfundar 2008), einum frá hverju aðildarfélagi. 3 varamenn verða kosnir til tveggja ára (til aðalfundar 2009), einn frá hverju aðildarfélagi.

Fyrsta stjórn hins nýja félags tekur við undirbúningi að stofnun hins nýja félags á stofnfundi og tekur síðan formlega til starfa um leið og félagið eða hinn 1. janúar 2007.

Formaður er kosinn sérstaklega, en að öðru leyti skiptir stjórnin með sér verkum. Stjórnin setur sér starfsreglur og ræður starfsmenn.

Stjórnin heldur fundi þegar formaður ákveður eða einhver stjórnarmanna óskar. Formaður stýrir fundum.

Kjararáð

12. gr.

Félagið gerir kjarasamninga fyrir þá félagsmenn sem vinna sem launþegar á grundvelli laga nr. 80/1938 um stéttarfélög og vinnudeilur eða laga nr. 94/1986 um kjarasamninga

opinberra starfsmanna. Kjararáð félagsins annast gerð kjarasamninga. Kjararáð skipar samninganefndir eftir þörfum. Kjararáð sér um vörslur vinnudeilusjóðs.

Kjararáð er skipað fimm félagsmönnum, sem kosnir eru í almennri bréflægri eða rafrænni kosningu fyrir aðalfund til tveggja ára í senn, þrjár annað árið en tveir hitt árið. Varamenn í Kjararáði eru þrjár, og er einn kosinn í ráðið það ár sem þrjár eru kosnir aðalmenn, en tveir það ár sem tveir eru kosnir aðalmenn.

Sviðsstjóri atvinnusviðs stýrir daglegri starfsemi kjararáðs.

Ákvæði til bráðabirgða. Kjararáð skal fyrst kosið á stofnfundi haustið 2006 þannig að þrjár aðalmenn skulu kosnir til tveggja ára (til aðalfundar 2009), tveir aðalmenn til eins árs (til aðalfundar 2008), einn varamaður til tveggja ára (til aðalfundar 2009) og tveir varamenn til eins árs (til aðalfundar 2008). Við fyrstu kosningu í kjararáð skal þess gætt að ráðið sé bæði skipað fulltrúum frá Stéttarfélagi verkfræðinga og Kjarafélagi tæknifræðinga.

Deildir og hagsmunafélög

13. gr.

Innan vébanda félagsins geta starfað deildir, svo sem sérgreinadeildir og landshlutadeildir. Sérgreinadeildir félagsmanna fjalla um málefni hinna ýmsu verkfræðigreina. Landshlutadeildir eru samtök félagsmanna, búsettra í hinum ýmsu landshlutum. Lög deilda og breytingar á þeim skulu hljóta samþykki aðalfundar á sama hátt og lög félagsins. Deildir mega ekki koma fram opinberlega í nafni félagsins nema með samþykki stjórnar. Deildir mega hafa sjálfstæðan fjárhag.

Fastanefndir

14. gr.

Fastanefndir eru skipaðar af stjórn til eins árs í senn og skal leitast við að þær endurspegli vilja og hugmyndir deilda félagsins. Fastanefndir skulu standa stjórn skil á starfsemi sinni. Fyrir lok hvers starfsárs skulu fastanefndir gefa stjórn skýrslu um starfsemi ásamt áætlunum um verkefni og fjárþörf nefndanna fyrir næsta starfsár.

Siðanefnd

15. gr.

Siðanefnd skal starfa í félaginu. Hlutverk hennar er að láta í ljós álit um ágreining, sem rísa kann vegna ætlaðs brots á siðareglum félagsins. Nefndin kemur saman ef tilefni er til. Siðanefnd starfar óháð stjórn félagsins og ákveður hvernig álit nefndarinnar er komið á framfæri. Í siðanefnd eiga sæti fimm fyrrverandi formenn félagsins þeir er síðast gegndu því starfi. Fráfarandi formaður skal þó ekki sitja í nefndinni fyrr en að tveimur árum liðnum frá því að hann lét af formennsku. Sé einhver nefndarmaður forfallaður tekur sá sæti í nefndinni sem gegndi starfi næst á undan þeim fimm o.s.frv. Formaður siðanefndar er sá sem fyrstur nefndarmanna gegndi formennsku í félaginu. Formaður kallar nefndina saman og stýrir fundum hennar.

Ákvæði til bráðabirgða. Við stofnun hins nýja félags skipa siðanefnd tveir eldri formenn hvers þeirra þriggja félaga sem standa að sameiningu félagsins, og skal við skipun hennar að öðru leyti gætt sömu reglna og að ofan greinir s.s. varðandi aldursröð.

Menntanefnd

16. gr.

Menntanefnd skal standa vörð um menntun verkfræðinga og tæknifræðinga og fylgjast með því námi sem í boði er hér á landi á því sviði. Menntanefnd skal vera stjórn félagsins til ráðuneytis um menntamál. Hún skal hafa frumkvæði að því hvernig félagið getur beitt áhrifum sínum gagnvart yfirvöldum menntamála í því skyni að ná markmiðum félagsins. Menntanefnd skal semja reglur um þær menntunarkröfur sem krafist er til inngöngu í félagið. Þessar reglur skulu hljóta staðfestingu stjórnar og skulu síðan gefnar úr. Menntanefnd skal skipuð minnst 3 tæknifræðingum og 3 verkfræðingum. Aðeins þeir sem hafa leyfi ráðherra til þess kalla sig tæknifræðing eða verkfræðing eru gjaldgengir til setu í menntanefnd.

Útgáfunefnd

17. gr.

Útgáfunefnd skal vera sviðsstjóra útgáfumála til fulltingis um útgáfu Árbókar og fréttablaðs félagsins svo og annarra verkefna á því sviði. Ritum skal dreift til allra félagsmanna.

Árbók skal vera vettvangur faglegrar umræðu og heimild um starfsemi félagsins. Hún skal koma út árlega. Fréttablað skal gefið út eigi sjaldnar en 10 sinnum á ári.

Aðalfundur

18. gr.

Aðalfundur skal haldinn í marsmánuði ár hvert. Ársþing félagsins skal halda í tengslum við aðalfund félagsins. Aðalfund og aukaaðalfund skal boða bréflaga eða rafrænt til allra félagsmanna með minnst 14 daga fyrirvara. Dagskrá fundarins skal tilkynnt í fundarboði, svo og allar tillögur sem þurfa samþykki aðalfundar samkvæmt félagslögum.

Aðalfundur og aukaaðalfundur eru löglegir, sé löglega til þeirra boðað. Skýrslur stjórnar og fastanefnda skulu liggja frammi á aðalfundi

Á aðalfundi skulu tekin fyrir þessi mál:

1. Skýrsla stjórnar og fastanefnda um störf félagsins á liðnu ári
2. Reikningsskil
3. Fjárhagsáætlun og ákvörðun félagsgjalda
4. Skýrslur og tillögur sérstakra nefnda, ef kjörnar hafa verið
5. Tillögur félagsstjórnar
6. Lagabreytingar
7. Lýst kosningu stjórnar
8. Kjör endurskoðanda og skoðunarmanns
9. Lýst kosningu í kjararáð félagsins
10. Laun formanns og stjórnarmanna
11. Önnur mál

19. gr.

Aukaáðalfund skal kalla saman þegar stjórninni þykir ástæða til eða þegar 100 félagar eða fleiri óska þess skriflega.

20. gr.

Félagsfundi skal boða þegar stjórn ákveður. Stjórnin ákveður fundarefni og fundartíma. Stjórn er skylt að boða til félagsfundar komi fram skrifleg krafa um það, þar sem fundarefni er tilgreint, frá a.m.k. 100 félagsmönnum. Félagsfundum stýrir kjörinn fundarstjóri. Hann tilnefnir ritara. Fundargerðir skal bóka.

Allsherjaratkvæðagreiðsla**21. gr.**

Stjórn félagsins getur látið fara fram allsherjaratkvæðagreiðslu þegar henni þykir ástæða til eða 100 félagar óska þess skriflega. Með allsherjaratkvæðagreiðslu má taka ákvörðun um öll þau mál, sem áðalfundir einir geta annars tekið ákvörðun um. Til samþykktar tillögu við slíka atkvæðagreiðslu þarf meira en helming greiddra atkvæða, nema um lagabreytingar, en þar þarf 2/3 hluta greiddra atkvæða. Allsherjaratkvæðagreiðsla fer fram skriflega eða með rafrænum hætti. Öllum félagsmönnum skal senda kjörgögn og þær tillögur, er greiða skal atkvæði um og tilkynna skilafrest á atkvæðaseðlum. Frestur þessi skal ekki vera skemmri en 3 vikur. Atkvæðaseðlar skulu sendir í pósthólf eða á póstfang félagsins, og skal pósthólfsnúmer og tölvupóstfang fylgja kjörgögnum. Þegar skilafrestur er útrunninn, skal stjórnin láta telja atkvæðin. Stjórn félagsins skal birta úrslit allsherjaratkvæðagreiðslu skriflega eða með rafrænum hætti.

Kjararáð getur látið fara fram allsherjaratkvæðagreiðslu með þeim hætti sem lýst er í 1. mgr. um boðun verkfalls, enda sé gætt ákvæða 15. gr. laga um stéttarfélög og vinnudeilur nr. 80/1938 eða 15. gr. laga um kjarasamninga opinberra starfsmanna nr. 94/1986. Einnig getur nefndin látið fara fram allsherjaratkvæðagreiðslu um afgreiðslu kjarasamninga, enda sé gætt ákvæða 5. gr. laga um stéttarfélög og vinnudeilur nr. 80/1938 eða 23. gr. laga um kjarasamninga opinberra starfsmanna nr. 94/1986. Við þá atkvæðagreiðslu eru þeir einir atkvæðisbærir sem eiga beina aðild að viðkomandi deilu.

Félagsgjöld**22. gr.**

Áðalfundur ákveður almennt félagsgjald og gjöld til fastanefnda að fengnum tillögum stjórnar. Gjaldldagi félagsgjalda er 1. apríl ár hvert. Heimilt er að greiða árgjald með jöfnum afborgunum að höfðu samráði við sviðsstjóra. Lendi félagsmaður í vanskilum með árgjald sitt er stjórninni heimilt að láta hann bera innheimtukostnað auk vaxta.

Skuldi félagsmaður árgjöld tveggja ára getur stjórnin fellt nafn hans af félagaskrá að undangenginni skriflegri viðvörðun. Félagsmaður öðlast félagsréttindi sín á ný þegar árgjaldaskuldin er að fullu greidd.

Félagar búsettir erlendis greiða þriðjung af fullu félagsgjaldi. Ungfélagar, félagar sem eru í fullu námi, félagar eldri en 70 ára og heiðursfélagar greiða ekki félagsgjöld. Stjórn getur tekið ákvörðun um eftirgjöf hluta félagsgjalda.

Skrifstofa

23. gr.

Félagið rekur skrifstofu til þjónustu við félagsmenn. Fyrir lok hvers starfsárs skulu sviðsstjórar afhenda stjórn framkvæmda- og rekstraráætlun fyrir næsta starfsár.

Reikningar og endurskoðun

24. gr.

Reikningsár félagsins er almanaksárið. Reikningar félagsins skulu vera endurskoðaðir af löggiltum endurskoðanda og félagslegum skoðunarmanni. Skulu reikningar birtir á aðalfundi.

Sjóðir

25. gr.

Vinnudeilusjóður er í vörslu Kjararáðs.

Hússjóður sér um rekstur Verkfræðingahúss.

Vísinda- og starfsmenntunarsjóður lýtur sérstökum reglum.

Aðrir sjóðir félagsins, að undanskildum sjóðum deilda, sem hafa sjálfstæðan fjárhag, skulu vera í vörslu stjórnar, og skal hún sjá um að þeir séu ávaxtaðir á tryggan hátt. Um sérstaka sjóði félagsins skulu samdar reglur og skulu þær samþykktar á aðalfundi og fjallað um þær eins og lög félagsins. Réttindi félagsmanna til greiðslna úr sjóðum eru háð því hvort félagsmenn greiða til viðkomandi sjóða eða ekki.

Gerðardómur

26. gr.

Félagið tekur að sér að skipa gerðardóm til þess að fella fullnaðarúrskurð um ágreining í tæknilegum málum. Reglur um skipun og störf slíks gerðardóms skulu hljóta sömu málsmeðferð og lög félagsins.

Lagabreytingar

27. gr.

Breytingar á lögum þessum má eingöngu gera á aðalfundi eða með allsherjaratkvæðagreiðslu. Tillögur um lagabreytingar, sem leggja á fyrir aðalfund skulu birtar í fundarboði. Til lagabreytinga sem bornar eru undir aðalfund þarf 2/3 greiddra

atkvæða. Sama gildir í allsherjaratkvæðagreiðslu. Ef innan við 10% félagsmanna taka þátt í atkvæðagreiðslu á aðalfundi um grundvallarbreytingu á VFÍ, svo sem sameiningu við önnur félög, reglur um félagsaðild eða mikilvægar ákvarðanir um fjármál VFÍ eða sjóða þess öðlast slík ályktun ekki gildi, nema hún verði samþykkt með 2/3 greiddra atkvæða á næsta aðalfundi. Eigi má selja eða veðsetja fasteign í eigu félagsins án samþykkis aðalfundar og þarf 2/3 greiddra atkvæða. Stjórn getur látið fara fram allsherjaratkvæðagreiðslu ef að mati hennar er óheppilegt að bíða með að fá lagabreytinguna afgreidda. Lagabreytingar skulu birtar félagsmönnum.

Félagsslit

28. gr.

Félaginu verður því aðeins slitið að félagsslitin séu samþykkt á saman hátt og gildir um lagabreytingar.

Félagsfundur tekur ákvörðun um ráðstöfun eigna félagsins.